

西至尉頭三百里北至烏孫赤谷六百一十里土地物類所有與鄯善諸國同東通姑墨二百七十里

龜茲國王治延城去長安七千四百八十里戶六千九百七十口八萬一千三百一十七勝兵二萬一千七十六人大都尉丞輔國侯安國侯擊胡侯卻胡都尉擊車師都尉左右將左右都尉左右騎君左右力輔君各一人東西南北部千長各一人卻胡君三人譯長四人南與精絕東南與且末西南與杆彌北與烏孫西與姑墨接師古曰杆音烏能鑄冶有鉛東至都護治所烏壘城三百五十里